

Nòta de premsa
6 de mai de 2010

Eth Sindic recomane cambis normatius tà evitar desigualtats enes servicis de transport e minjador escolars

Eth Sindic de Grèuges a recomanat era elaboracion de nauï decretus sus era provision des servicis de transport e minjador escolars. En aguesta naua regulacion propòse que s'incorpòren nauï supausats entà gaudir d'aguesti servicis gratuïtament, com ara eth dera distància geografica e eth dera renda, ath delà deth d'escolarizacion en un municipi desparièr deth de residència des alumnes, er unenc previst ena normativa actua.

Aguesta proposicion ei un des suggeriments que recuelh er informe extraordinari *La provisió i l'accés als serveis de transport i menjador escolars*, qu'eth sindic, Rafael Ribó, a liurat aué ath Parlament. Entre es ans 2007 e 2009 a rebut 69 queishes relacionades damb eth transport escolar e 73 damb eth minjador escolar. En tres ans eth nombre de queishes s'a doblat.

Er informe expause que i a comunitats autonòmes qu'an prebotjat normatives entà ampliar era gratuïtat deth servici e qu'incorpòren critèris de distància geografica (distància deth domicili ara escola superiora a tres quilomètres), de configuracion urbana (municipis damb nuclèus disseminadi), de besonh economic (nivèu baish de renda familiara), de besonh educatiu (alumnat damb discapacitat escolarizat en centres ordinaris) e, ath delà, non ac limiten as ensenhaments obligatòris. En Catalunya non s'establisson cap d'aguesti supausats.

Era regulacion tanben aurie de servir tà auançar en condicions mès equitatives de provision de servicis de minjador e de transport escolar. Actuaument, era gestion per part des conselhs comarcaus d'aguesti dus servicis provòque diferéncias territoriaus significatives en çò que hè as condicions de provision (grad de copagament des famílies, nivèu d'implantacion des politiques d'accessibilitat economica, critèris de concession de bèques, etc.). Açò hè que famílies catalanes enes madeishes condicions de provision agen oportunitats substanciaument desparières d'accedir ara gratuïtat deth servici.

Maugrat qu'era partida pressupostària destinada ara provision des servicis de minjador a experimentat increments enes darrèrs ans, er augment dera despena e deth nombre de beneficiaris non a servit entà incrementar de forma significativa era cobertura des politiquas de bèques minjador.

Er anonci deth Departament d'Educacion d'incrementar era partida deth minjador escolar non obligatòri en 15 milions d'euros entath cors 2009-2010 permeterà aumentar en 30.000 alumnes eth nombre de beneficiaris. Tot e avalorar plan positivament er augment, calerà estudiar en futur s'ei sufisent entà corbir pleament es besonhs existents. En aquest sentit, a despièch d'aquest augment, cau tier present qu'era partida pressupostària actuau encara non permet dar cobertura ath conjunt dera demana e que, prenent coma referéncia era taxa de risc de praubesa infantila, eth 50% d'alumnes en situacion de risc de praubesa non poderien èster receptors de bèca se volessen hèr us deth servici de minjador escolar. Segontes eth Sindic, es lumedars de renda a compdar des quaus se concedís bèca de minjador escolar non obligatòri son encara massa restrictius.

Era congelacion dera partida pressupostària destinada ath transpòrt escolar non obligatòri a hèt a aflorar era formula deth copagament entre era Administracion e es famílies. En aquest sentit, eth Sindic demane que se desenvolopen politiquas d'ajudes mès actives entà esvitar que famílies damb problèmas economicos non hèsqnen us deth servici. Ath delà, en quauqui casi, eth crubament de quòtes pòt representar un grèuge, especiaument quan i a d'outes famílies que demoren mès apròp deth centre e an eth transpòrt gratuït sonque peth hèt de demorar en un aute municipi.

D'outes recomanacions e suggeriments

- Omogeneïzar es critèris sociaus e economicos basics qu'an d'ordenar er accés as bèques minjador e transpòrt escolar concedides pes conselhs comarcaus.
- Incrementar progressivament era despena publica en bèques minjador escolar non obligatòri, pr'amor qu'era cobertura d'aquestes bèques sigue equivalenta ara taxa de risc de praubesa infantila.
- Generalizar, per part de toti es conselhs comarcaus, sistèmas de bèques dubèrts pendent tot eth cors, tà pr'amor de garantir era cobertura des besonhs subervengudes.

- Garantir er accés gratuït der alumnat damb besonhs educatius especiaus en transpòrt e en minjador damb era concession d'ajudes.
- Estudiar era provision deth servici de transpòrt entàs alumnes des ensenhaments non obligatòris, especiaument en bachelierat e era formacion professionau.
- Garantir era actualizacion periodica des critèris de distribucion entre conselhs comarcaus des recorsi financèrs qu'eth Departament destine a transpòrt e minjador escolars damb critèris que non sonque dimensionen eth volum de poblacion potenciaument destinatària deth servici, senon tanben eth nivèu de besonh sociau existent en cada moment e en cada territòri, tà pr'amor d'esvitar es desigualtats comarcaus detectades enes nivèus de cobertura.
- Identificar e resòlver es deficits de planificacion escolara en determinades zònes que hè que i age alumnes escolarizats forçosament en escòles plan luenh deth sòn domicili.

